

## lis Gnovis

## ■ UDIN. Spazis radiotelevisifs gnûfs



La convenzion fra Guvier di Rome e «Rai» pes transmissions in marilenghe e je daûr a scjadi. Sû par jù a mancin uns 50 dîs. Di chê strade, cul intindiment di favorî un potenziament dal servizi radiotelevisif par furlan midiant di spazis gnûfs di culture, di spettacul e d'informazion, l'Assemblee de Comunitât linguistichis furlane «ACLIF» e à imaneât une convigne video par confrontâ «L'ufierte radio tv pes Comunitâts linguistichis in Italie». Intal dibatiment, fat ai 13 di Març, a son intervignûts esperts furlans, slovens, todescs, ladins e francês e soestants triestins e romans.

## ■ PUART. Osservazions sui Plans idrografics

Il Distret idrografic des Alps orientâls al è daûr a meti in zornade i Plans di gjestion des aghis («Pga») e di gjestion dai pericui causonâts des brentanis («Pgra») pai agns dal 2021 al 2027. I documents prontâts a van tamesâts midiant de consultazion publice stabilide dal articul 66, come 7 dal decret legjislatif 152/2006. Par chel, tal lûc internet [www.alpiorientali.it](http://www.alpiorientali.it), si pues scrutinâ i doi Plans di gjestion e si pues burî fûr il modul pes osservazions scritis. Il timp permetût par intervignî al dure 6 mès, dai 5 di Març di chest an.

## ■ TOR DI ZUÏN. Sot dai vôi di Michelangelo Antonioni

Dal 1949, prin ch'è sfloris la sô straordinarie carriere cinematografiche, il regjist Michelangelo Antonioni al fo invadât di «Snia Viscosa» a prontâ un documentari sui stabiliments chimics ch'a àn trasformât il Tor in Torviscosa. L'opare «Sette canne, un vestito», recuperade dal 1994 tai archivis di «Industria Chimica Caffaro» e tignude cont dal Cumon, in grazie di «Adessocinema», si podarà viodile «in streaming», a gratis, a la direzion web [www.adessocinema.it](http://www.adessocinema.it). «Adessocinema» al è il servizi screât intant de pandemie di «Cineteca del Friuli», di «Cinemazero» di Pordenon, dal «Visionario» di Udin e di «Tucker Film».

## ■ SAN ZORÇ DI NOIÂR. Vôs gnovis pe Basse

Al torne il concors leterari «Vôs de Basse», ch'al intint di onorâ «lis figuris che a àn insiorât il panorame culturâl de Basse Furlane, dai viers scherçôs e a dadis cence pèi su la lenghe di Pre Zaneto e di Tita Marzuttini, ai componiments plui intims di Gina Marpillero e di Luciano Morandini, dai tescj teatrâi di Alviero Negro, ai lavôrs storics e aes traduzions di Pierluigi Visintin». Il regolament al propon 4 sezions, 3 pai grancj (narative, poesie, traduzion) e une pai students des scuêlis secundariis di prin e di secont grât (conte curte o componiment poetic). Lis voris a varan di rivâ li dai municipi di San Zorç dentri dai 17 di Mai.

Miercus 17	S. Patrizi vescul	Domenie 21	V Domenie di C.
Joibe 18	S. Ciril di Jerusalem	Lunis 22	S. Benvignût vescul
Vinars 19	S. Josef	Martars 23	S. Turibi vescul
Sabide 20	S. Alexandre martare	Il timp	Bielis zornadis serenis



**Il soreli**  
Ai 17 al iève aes 6.16 e al va a mont aes 18.16.



**La lune**  
Ai 21 Prin cuart.

**Il proverbi**  
Si cognôs il ben co al è finît e plui nol ven.

**Lis voris dal mès**  
Dopo vè prontât ben il teren jechè par jechè e je ore di semenâ salatis, lidric, savôrs, cocis, cucins, carotis, cesarons, jerbetis rossis, capûs.

## Justizie idriche par ducj

Ai 22 di Març e cole la «Zornade mondiâl pe aghe»

A laran indevant fintremai ai 4 di Avril, zornade di Pasche Maiôr, lis «Siet setemanis pe aghe», che la Rêt ecumeniche pe aghe «Ecumenical Water Network» (Ewn) a son agns che lis organize, in convigne cul Consei mondiâl des Glesiis «World Council of Churches» (Wcc). L'iniziativa e compagne dute la Coresime e a cole tes stessis zornadis che si celebre la «Zornade mondiâl pe aghe», stabilide ai 22 di Març di ogni an, par volontât des Nazions unidis.

Il fin al è chel di sensibilizâ i Cristians e, dutun cun lôr, dute l'opinion publice su la cuistion de scjarsetât e de cualitât da lis risorsis idrichis, che simpri plui a discjadenin vueris e patiments di ogni fate. Presentant l'iniziativa, il «Wcc» al à marcât che «cun dut che, te tradizion cristiane, l'aghe e à un significât spirituâl fuart, stant ch'è je don di Diu, un ûs spropositât e l'incuïnament causonât de umanità a menacin cheste risorse essenziâl e lis personis che no àn acès a aghe buine a son miliarts». La campagne cristiane di sensibilizazion, ogni an, e invide a profondi la cognossince di une region dal mont, cui siei fastidis ma ancje cu lis sôs iniziativis par saltâ fûr dai pastiçs. Vie pes «Siet setemanis pe



Cun cheste foto, «Wcc» al presente il servizi «Together for water» (© Albin Hillert/WCC)

## La Rêt ecumeniche pe aghe «Ewn» e il Consei mondiâl des Glesiis «Wcc» a curin «Siet setemanis pe aghe»

aghe» dal 2021, l'atenzion e sarâ concentrade sui popui natifs dal Pacific Nord occidental. In cheste forme – a scjarissin i organizadôrs de Rêt «Ewn» –, profundint lis strussis di chestis Nazions, al larâ indevant «il nestri pelegrinaç di justizie da l'aghe». L'opare di sensibilizazion su lis cuistions leadis cu l'aghe, «Don di Diu» e «Ben comun universâl», curade dal «World Council of Churches», za fa cualchi setemane si è slargjate midiant di un altri imprest, gnûf crei. Si trate de «Newsletter» mensil «Together for water» ([www.oikoumene.org/resources/documents/wcc-ecumenical-water-network-newsletter-january-2021](http://www.oikoumene.org/resources/documents/wcc-ecumenical-water-network-newsletter-january-2021)), nassude par diventâ l'imprest dulà che si confronte ideis e progiets imaneâts par meti in vore la «Justizie idriche» de bande da lis Glesiis

congregadis tal Consei internazionâl. Ma il servizi informatif ur darâ un biel acet ancje a dutis lis personis di buine volontât ch'a operin par che il Dirit uman a l'aghe al sedi garantît dapardut. Juste ai 22 di Març, la «Zornade mondiâl de aghe» e sarâ memoreade chenti cuntune convigne, par cure dal Centri pal volontariât internazionâl «CeVi» e dal «Forum talian dai Moviments pe aghe». Te suaze dai apontaments publics dal Cors di formazion «Solidarietà per Azioni» (<https://www.facebook.com/spa.fvg/>), a 20.30, si podarà confrontâsi «on line» su «L'avignî de aghe nol è in Borse».

Mario Zili

## Gurize. Ai 19 di Març, siopar climatic

Ancje i grops regionâi di «Fridays For Future», a Cividât, in Cjargne, a Gurize, a Pordenon e a Udin (<https://fridaysforfuturefvg.it>), a son daûr a preparâ il prin siopar globâl dal 2021 cuintri de crisi climatiche. Al colarâ ai 19 di Març, tai lûcs e tes formis ch'al sarâ pussibil d'inventâ intal mieç de balfuerie Covid. Il sproc ch'al compagnarà ogni proteste al sarâ: «Avonde promessis falsis», stant che i soestants – a disin la zoventût – ancjemò no àn tacât a frontâ come cu va i mudaments climatics.

## Peraulis in dismentie

par cure di Mario Martinis

## ❖ PIVOC

s.m. = germoglio  
(nome derivato da pive "canna", dal latino parlato pipa "fischio", da pipare "chiocciare, pigolare" di origine onomatopeica)  
In Març par prins a sburtin i pivocs dai cisignocs.  
In Marzo per primi escono i germogli dei crocus.

## ❖ PLADINE

s.f. = catino di terracotta, spesso inverniciato a colori vivaci, per uso culinario (dal latino medievale pladena, dal greco plathanon "scodella")  
Pe cene di usnot prepare une pladine di lidric cul poc e ûfs dûrs.  
Per la cena di stasera prepara un piattone di radicchio col cespò e uova sode.

## ❖ PLAÏT

s.m. = proclama, discorso solenne (voce antica friulana)  
(voce dotta dal latino placitum "ciò che riscuote approvazione; opinione; precetto")

Sêstu pront par lâ a sinti il plait te place dal municipi?  
Sei pronto per andare ad ascoltare il discorso solenne nella piazza del municipio?

## ❖ PLANE

s.f. = davanzale, pianura  
(dall'aggettivo latino planea "del piano", a sua volta dal latino plānus "piano")  
Isal restât indurmidit in cualchi plane di barcon?  
È rimasto addormentato su qualche davanzale?  
La plane e je inmò inmatudine sot lis zulugnis di Fevrâr.  
La pianura è ancora intorpidita sotto le brine di Febbraio.  
"Ju pes planis, pes steulis, Pei sorcs e pei formentz..." (Podrecca 74)

## ❖ PLATÂ

v. = nascondere  
(continua il latino plantare "piantare, trapiantare, dare stabilità")  
No sta platâ i biscots, che il canai ju à bielzà viodûts.  
Non nascondere i biscotti che il bambino li ha già addocchiati.

## Messe par furlan

La Messe par furlan e ven cjantade ogni sabide a 5 e mieze sore sere (17.30), li de capele de «Puritât», daprûf dal domo. Sabide ai 20 di Març al cjantarà messe bons. Duilio Cuarnâl. Radio Spazio e trasmet sul moment la liturgjie.